

«Forschung live» – Tge muntan insumma quests nums?

■ (drg) Sonda, ils 20 da zercladur 2015 ha lieu a Tavau il festival da las ciencias «Forschung live – in Graubünden». Quest arranschament preschenta il vast spectrum da la perscrutaziun en il Grischun. Era da la partida è l'Institut dal DRG sco commember da l'Academia Rætica che promova la scienza e la perscrutaziun en il Grischun. Il festival ha lieu en las localitads da la Scola media alpina a Tavau. En ses punct da program dat l'Institut dal DRG in'invista en la perscrutaziun da la lingua, surtut en quella dals nums locals – e quai cun agid dad in giu da memory. Punct da partenza en il giu è la dumonda «Tge muntan insumma quests nums?» ed i vala da chattar la dretga derivanza e muntada da divers nums grischuns. P. ex. danunder derivan nums locals sco «Küblis» e «Sursaisa» u nums da famiglia sco «Flury» e «Camenisch»? E tge muntan insumma ils nums da las tratgas «maluns» e «capuns»?

Il giu cun ils nums e la discussiun sur da nums ha lieu durant l'entir di da las 10.00–16.00 en la mediateca da la Scola media.

Cun la turnea «Forschung live» en l'entira Svizra festivescha l'Academia svizra da las ciencias natiralas (SCNAT) l'onn 2015 ses giubileum da 200 onns. Dal zercladur fin l'october 2015 van trais installaziuns interactivas sin viadi tras la Svizra. Organizaziuns partenarias organischan en ils lieus da fermada in program accumpagnant per pitschen e grond. L'organizaziun responsabla en il Grischun è la Graduate School Graubünden. Il festival a Tavau è punct da partenza per ina retscha dad arranschaments en l'entir Grischun che tracta dal zercladur fin il december 2015 tematicas da las ciencias natiralas.

L'entir program da «Forschung live» chattais
Vus sin www.forschung-live.ch
e www.gsgr.ch